

巢氏
病源



重刊巢氏諸病源候總論卷八

傷寒病諸候下

凡四十四論

傷寒餘熱候

傷寒病其人或未發汗吐下或經服藥已後而脈洪大實數腹內脹滿小便赤黃大便難或煩或渴面色變赤此爲府藏有結熱故也

傷寒五藏熱候

傷寒病其人先若身熱噤乾而渴飲水卽心下滿灑淅身熱不得汗惡風時欬逆者此肺熱也若其人先苦身熱噤乾而小腹

繞臍痛腹下滿狂言默默惡風欲嘔者此肝熱也若其人先苦
手掌心熱煩心欲嘔身熱心下滿口乾不能多飲目黃汗不出
欲得寒水時妄笑者此心熱也若其人先苦身熱四支不舉是
脛寒腹滿欲嘔而泄惡聞食臭者此脾熱也若其人先苦噤乾
內熱連足脛腹滿大便難小便赤黃腰脊痛者此腎熱也

傷寒變成黃候

陽明病無汗小便不利心中懊憹必發黃若被火額上微汗出
而但小便不利亦發黃其人狀變黃如橘色或如桃枝色腹微
滿此由寒濕氣不散瘀熱在於脾胃故也

傷寒心腹脹滿痛候

此由其人先患冷癖因發熱病服冷藥及飲冷水結在心下此爲藏虛動於舊癖故也或吐下已後病不解內外有熱故心腹脹滿痛此爲有實也

傷寒宿食不消候

此謂被下後六七日不大便煩熱不解腹滿而痛此爲胃內有乾糞挾宿食故也或先患寒癖因有宿食又感於傷寒熱氣相搏故宿食不消

傷寒大便不通候

傷寒陽脈微而汗出少爲自始汗出多爲太過陽明脈實因發其汗汗出多者亦爲太過太過者陽氣絕於裏陽氣絕於裏則津液竭熱結在內故大便牢而不通也

傷寒小便不通候

傷寒發汗後而汗出不止津液少胃內極乾小腸有伏熱故小便不通

傷寒熱毒利候

此由表實裏虛熱氣乘虛而入攻於腸胃則下黃赤汁此熱毒所爲也

傷寒膿血利候

此由熱毒傷於腸胃故下膿血如魚腦或如爛肉汁壯熱而腸痛此濕毒氣盛故也

傷寒利候

傷寒病若表實裏虛熱乘虛而入攻於腸胃則下黃赤汁若濕毒氣盛則腹痛壯熱下膿血如血腦如爛肉汁若寒毒入胃則腹滿身熱下清下清者不可攻其表汗出必脹滿表裏俱虛故也傷寒六七日不利更發熱而利者其人汗出不止者死但有陰無陽故也下利有微熱其人渴脈弱者今自愈脈沈弱弦者

下重其脈大者爲未止脈微數者爲欲自止雖發熱不死少陰
病八九日而身手足盡熱熱在膀胱必便血下利脈浮數尺中
自滑其人必清膿血若利止惡寒而拳手足溫者可治也陽明
病下利其脈浮大此皆爲虛弱強下之故傷寒下利二十餘行
其脈反實死

傷寒病後胃氣不和利候

此由初受病時毒熱氣盛多服冷藥以自瀉下病折已後熱勢
既退冷氣乃動故使心下幅牢噫噦食臭腹內雷鳴而泄利此
由脾胃氣虛冷故也

傷寒上氣候

此由寒毒氣傷於太陰經也太陰者肺也肺主氣肺虛爲邪熱所客客則脹脹則上氣也

傷寒欬嗽候

此由邪熱客於肺也上焦有熱其人必飲水水停心下則肺爲之浮肺主於欬水氣乘之故欬嗽

傷寒衄血候

傷寒病血衄者此由五藏熱結所爲也心主於血肝藏於血熱邪傷於心肝故衄血也衄者鼻血出也肺主於氣而開竅於鼻

血隨氣行所以從鼻出陽明病口燥但欲漱水不欲咽者必衄衄家不可攻其表汗出額上蘊急而緊直視而不能瞬不得眠亡血不可攻其表汗出則寒慄而振脈浮緊發熱其身無汗自衄者愈

傷寒吐血候

此由諸陽受邪熱初在表應發汗而汗不發致使熱毒入深結於五藏內有瘀積故吐血

傷寒陰陽毒候

夫欲辨陰陽毒病者始得病時可看手足指冷者是陰不冷者

是陽若冷至一二三寸者病微若至肘膝爲病極過此難治陰陽毒病無常也或初得病便有毒或服湯藥經五六日以上或十餘日後不瘥變成毒者其候身重背強喉咽痛糜粥不下毒氣攻心心腹煩痛短氣四支厥逆嘔吐體如被打發斑此皆其候熏過三日則難治陽毒者面目赤或便膿血陰毒者面目青而體冷若發赤斑十生一死若發黑斑十死一生陽毒爲病面目斑斑如錦紋喉咽痛清便膿血七日不治五日可治九日死十一日亦死

壞傷寒候

此謂得病十二日已上六經俱受病訖或已發汗吐下而病證不解邪熱畱於府藏致命病候多變故曰壞傷寒本太陽病不解轉入少陽脇下牢滿乾嘔不能食往來寒熱尙未吐下其脈沈緊與小柴胡湯若已吐下發汗飲柴胡證罷此爲壞病知犯何逆以法治之寸口脈洪而大數而滑洪大榮氣長滑數胃氣實榮長陽卽盛鬱拂不得出胃實卽牢大便難卽乾燥三焦閉塞津液不通醫已發陽氣盛不用復重下之胃燥畜大便遂儼小便不利榮衛相搏煩心發熱兩目如火鼻乾面正赤舌燥齒黃焦故大渴過經成壞病

傷寒百合候

百合病者謂無經絡百脈一宗悉致病也多因傷寒虛勞大病之後不平復變成斯疾也其狀意欲食復不能食常默默欲得臥復不得臥欲出行復不能行飲食或有美時或有不用飲食如強健人而臥不能行如有寒復如無寒如有熱復如無熱若小便赤黃百合之病諸藥不能治得藥卽劇吐利如有神靈者身形如和其人脈微數每尿輒頭痛其病六十日不愈若尿頭不痛淅淅然者四十日愈若尿快然但眩者二十日愈體證或未病而預見或病四五日而出或病二十日一月微見其狀惡

寒而嘔者病在上焦也二十三日當愈其狀腹滿微喘大便鞭
三四旦大便時復小溏者病在中焦也六十三日當愈其狀小
便淋瀝難者病在下焦也四十一日當愈各隨其證以治之耳

傷寒狐惑候

夫狐惑二病者是喉陰之爲病也初得狀如傷寒或因傷寒而
變成斯病其狀默默欲眠目攣不得臥臥起不安蟲食於喉咽
爲惑食於陰肛爲狐惡飲食不欲聞食臭其人面目翕赤翕黑
翕白食於上部其聲嗄食於下部其咽乾此皆由濕毒氣所爲
也

傷寒濕匿候

凡得傷寒時氣熱病腹內有熱又人食少腸胃空虛三蟲行作求食食人五藏及下部匿病之候齒無色舌上盡白甚者唇裏有瘡四支沈重忽忽喜眠於此皆爲蟲食其肛肛爛見五藏卽死當數看其上脣內有瘡唾血脣內如粟瘡者則心內懊懣痛此蟲在上食其五藏下部生瘡者其人不寤此蟲食下部皆能殺人

傷寒下部痛候

此由大腸偏虛毒氣衝於肛門故下部卒痛甚者痛如鳥啄

傷寒病後熱不除候

此謂病已間五藏尙虛客邪未散真氣不復故旦暮猶有餘熱如瘥狀此非真實但客熱也

傷寒病後渴候

此謂經發汗吐下已後府藏空虛津液竭絕腎家有餘熱故渴傷寒病後不得眠候

夫衛氣晝行於陽夜行於陰陰主夜夜主臥謂陽氣盡陰氣盛則目瞑失令熱氣未散與諸陽并所以陽獨盛陰偏虛雖復病後仍不得眠者陰氣未復於本故也

傷寒病後虛羸候

其人血氣先虛復爲虛邪所中發汗吐下之後經絡損傷陰陽竭絕熱邪始散真氣尙少五藏猶虛穀神未復無津液以榮養故虛羸而生病焉

傷寒病後不能食候

此由陽明太陰受病被下之後其熱已除而脾胃爲之虛冷穀氣未復故不能食也

傷寒病後虛汗候

夫諸陽在表陽氣虛則自汗心主於汗心臟偏虛故其液妄出

也

傷寒內有瘀血候

夫人先瘀結在內因傷寒病若熱搏於久瘀則發熱如狂若有寒則小腹滿小便反利此爲血瘀宜下之其脈沈結者血證諦也

傷寒毒攻眼候

肝開竅於目肝氣虛熱乘虛上衝於目故目赤痛重者生瘡翳白膜息肉

傷寒毒攻足候

